



Japan Transport Minister-i Surat nung
bullet train yangluba tesem semdang

World Weightlifting Championships
nung Mirabai Chanu-i silver angu

VOL. XXII ISSUE NO. 349 (ADOK 349) DIMAPUR KÜPTOKNÜ (SATURDAY) MONGPUTENI (OCTOBER) 04, 2025 ₹ 5.00

Centre-i NE nem Rs 8,668 crore tax devolution agütsüogo

Guwahati, October 3, 2025

(Agencies): October 1, 2025 nü Centre sorkari state ajak nem additional tax devolution ama Rs 1,01,603 crore agütsüogo.

Benjung mongpu mapang state nung terenlok mapa inyaksü aser nübortem yaritsü atema sen talila agütsü ta Ministry of Finance-i metetdaksü.

October 10 nü agütsütsü aliba regular monthly devolution Rs 81,735 crore den yaritepa Centre-i advance release agütsüogo.

Benjungmung mapang state tem capital expenditure teimba

akümtsü aser welfare schemes tashi itdaksütsü atema senotsü talila agütsüsem ta Finance Ministry-isa ashi.

Northeastern state 8 külemi Rs 8,668 crore lempzük. Iba nung Assam-i sen teimtiba Rs 3,178 crore aser tanabuba nung Arunachal Pradesh-i Rs 1,785 crore lempzükogo.

Assam - Rs 3,178 crore
Arunachal Pradesh - Rs 1,785

Meghalaya - Rs 779 crore
Manipur - Rs 727 crore
Tripura - Rs 719 crore
Nagaland - Rs 578 crore
Mizoram - Rs 508 crore
Sikkim - Rs 394 crore

India nung child marriages kanga bulur

Guwahati, October 3, 2025

(Agencies): 2023 küm Prohibition of Child Marriage Act, 2006 kübok ken o aika benoka liasü aser iba nung ken o 90% tashi Assam nung liasü.

National Crime Records Bureau (NCRB) data ajanga 2023 nung child marriages ken o 6,038 benok. 2022 nung ken o 1,002 aser 2021 nung 1,050 dang benoka liasü.

Assam nung iba ken o 5,267 benoka liasü, aser parnok sülen Tamil Nadu (174), Karnataka (145), aser West Bengal nung

118 benok.

Chhattisgarh, Nagaland, Ladakh, aser Lakshadweep amala state aser Union Territory kar nungbo ken o kecha maliasü.

Prohibition of Child Marriage Act, 2006 ajanga tetsür arishi küm 18 aser tebur 21 teküpok kibong akümtsü memelar. Ibala kiyimba sentong anepalurtem ozüing kübok merenshir.

NCRB data ajanga 2023 küm tetsür 16,737 aser tebur 129 tashi kibong akümtsü atema pur aoba shia lir.

Pakistan kübok PoK nung tashiyim inyakba aitsür: India

New Delhi, October 3, 2025

(Agencies): Pakistan ketdangsürtemi Pakistan-occupied Kashmir (PoK) nung lungkak aiterem dak tashiyim inyakba aser nisung 10 tepsetba den aika yirutsüba aitsür ta India-i metetdaksüogo.

Pakistan-i human rights alema inyaksangshiba atema merenshitsüla. Jammu Kashmir Joint Awami Action Committee (JAAC),

PoK nung taoba ita lungkak aiterem aser sepaitem tsüingda mepetmesü adoka raratep.

Jammu Kashmir Joint Awami Action Committee (JAAC)-i sorkar ketdangsürtem aser minister tem asoshi "elite privileges" anentsü aser Jammu and Kashmir nungi refugees nem assembly menden 12 agientsü takhangba agüja lungkak ait.

JAAC nung civil society groups aser shishilembartem dena lir.

PoK nung alirtemi ozüing alema inyaksangshiba anema mokdang ayongzüka amunger.

External affairs ministry spokesperson Randhir Jaiswal-ia PoK tesem aika nung lungkak aitba aser Pakistani sepaitem tai maketba civilian dak tashiyim inyakba osang metetdaksüogo.


Pakistan-i tashiyim agi yimsü asüba aser item tesemtem nungi ali rongsen agiteta agiba ajanga iba tensa ya ajuruogo. Pakistan-i human rights violations atema merenshitsüla ta Jaiswal-i ashi.

Jammu, Kashmir aser Ladakh ya India nung tongti shilem ka lir aser maneni yamaji alitsü ta paisa ashi.

Hokolbarnü Pakistan federal government-i yokba olemteper kari PoK yimtiba Muzaffarabad nung

JAAC teshimtet nübotem den ajurutepa senden menogo. Iba tesem nung mepetmesütep anentsü atema parnok senden amen. JAAC aser federal o PoK governments tsüingda olemtep melitettsüsa akümba sülen taoba hopta nungi lungkak aitba tenzüka liasü.

AKTK-i Kaketshir Anogo Den Lokti Senden 2025 ayonga amung



Dimapur, October 3, 2025

(TYO): Ao Kaketshir Telongiem Kohima (AKTK)-i October 2, 2025 nü Kaketshir Anogo Den Lokti Senden 2025 ayonga mungogo.

Iba sentong ya "Lepa Reprangshiang, Arangshishiang aser Aramesoang (Reflect, Realign & Arise) omen nung ajemdaker Molu Ki, Merhültetsa, Kohima nung iba sentong agi.

Sentong nung tongti o jembirji Animal Husbandry and Veterinary Services Director Dr. B.M. Sunep Imchen liasü.

Dr. B.M. Sunep Imchen-i takok tajung anguba kaketshirtem nem tenüngsang

aser kaket shisatsü anguba dang masü senso tajungtem akümtsü ayongzü.

"Asenoki asen tangatetba aser tebilemba melenshitsüla, tajungba akümtsü merangtsüla aser nükjidong yur alitsüla" ta pai kaketshirtem dang ashi.

"Lanurtemi pei pei taküm meyipa reprangshiang, maitsü aser nükjidong jangjang kechiyong iba ya meimchir ka asoshi tongtipangba lir. Nenok sasa ni shiba? Kechiba ni yangi aru? ta asüngdangang. Na komala nisung kümdir kümaka na tajangzü.

Paisa Naga nunger

shisaliok indang putiotsü lemsatep aser asenoki tangutsü meimlai loktiliba yaritsüla ta ayongzü.

Iba sentong nung Sentilong Longchar-i tesentepertem pelaa agizük aser Watsü Telen Kohima T. Bendangsenla-i tajungshi o jemb.

"Kaketshirtem sadoka aliba nungi adokang, tayongzükbater koktettsü merangang aser shisaliok bushiba nung temulung agütsüdang maongkatem-a bushiang" ta Bendangsenla-i ajungshi.

AKTK-isa kaketshir 9 nem Meritorious Awards agütsü. Parnok ya HSLC nungi tenet aser HSSLC nungi 2 lir.

Centre-i tanur nem Cough Syrups magütsütsü tuyur

New Delhi, October 3, 2025

(Agencies): Madhya Pradesh nung tanur 9 aket mozü jemer asüba sülen Ministry of Health and Family Welfare-i tanurtem cough syrup kümdanga jemdaksütsü tetuyuba ka agütsüogo.

Arishi küm 2 ser teküpok tanurtem nem cough aser cold medications magütsütsüla aser public-i doctor temi ashiba angatsüla ta Ministry-isa metetdaksüogo.

"Arishi küm 2 ser teküpok tanur nem cough aser cold medications magütsütsüla. Item mozü ya arishi küm 5 ser teküpokpur atema masü saka arishi küm 5 ser temapurtem atema lir. Amshitsüsa kümra doctor dang jungjunga asüngdangteptsüla aser dose shitak agütsütsüla. Public-i Doctor temi ashiba sülen anidaksüla" ta Directorate

General of Health Services-i metetdaksü.

Tawa Madhya Pradesh nung tanurtem syrup ajemba sülen asüba osangtem angazükba sülen cough syrup samples tendangba nung toxic contaminants kecha maliasü ta Ministry of Health and Family Welfare-isa ashi.

"Madhya Pradesh nung tanurtem cough syrups ajemba sülen asü ta osangtem angashiba agi National Centre for Disease Control (NCDC), National Institute of Virology (NIV), Central Drugs Standard Control Organisation (CDSCO) nungi teshimtet telok ka tesem tonga yok" ta Ministry-isa ashi.

State ketdangpurtem den amalitepa cough syrups balala indang samples benden. Onoki tendangba samples nung Diethylene Glycol (DEG) mesüra Ethylene Glycol (EG)

aliba meputet. Iba ajanga kidney kanga mejungi kümdaksür ta parnokisa metetdaksü.

Rajasthan nung tanur ana asüba atema Ministry-isa samples nung Propylene Glycol alilba meputet ta ashi. Ajisüaka mozütemji dextromethorphan-based formulations liasü aser iba ya tanurtem nem magütsür.

"NEERI, NIV Pune, aser tanga laboratories nung water, entomological vectors, aser respiratory specimens samples tendangdar. NCDC, NIV, ICMR, AIIMS Nagpur aser state health authorithes nungi multi-disciplinary team kati tanurtem asüba atema bushisüngdang südar" ta Ministry-isa metetdaksü.

Rajasthan nung tanur ana asübaji "contaminated cough syrup" ajanga liasü saka mozü nung Propylene Glycol maliasü ta parnokisa ashi.

Anentzübo Sector nung tantsür tamburtem anogo sentong aka



Anentzübo Sector nung tantsür tamburtem anogo sentong akadang sentong nung adener tantsür tamburtem den tongti tejaoker Wt.Meyalemla Ao aser sector yimsüsürtem tangokba noksa.

Mokokchung, Mongputeni/October 03 (TYO): Alima ajunga den külemi Anentzübo Sector Mokokchung village nung Bodhbarnü International Day of Older Persons sentong par sector community hall nung kanga dang longso longsoa kaogo.

Iba sentong nung tongti tejaoker Wt.Meyalemla Ao, CDPO Ongpangkong North Department of Social Welfare-i jembidang alima nung tantsür tamburtem nem akhüm agüja tushiba anogo nung nübür aikati meinyakba mapa ka kiyong tilaka dang süaka anentsübo nung iba ama tantsür tamburtem nem akhüm agüja tushiba sentong akaba ya kanga dang junger, aser iba ya la k m 20 tema sorkar mapa inyaka arudang sector kati iba ama tantsür tamburtem nem akhüm agüja tushiba mapa tajung inyakba ya mezüngbuba lirta

Anentzübo sector nung yimsüsürtem nem tenüngsang agüja ashi.

Tanü tantsü tamburtem nenok taküm tajung aliba mapang alima aser nübür asoshi mapa tajung aika inyakogo, anungji nenok tain kümer alidang nenoki mapa tajung inyakba asoshi pela-a tenüngsang agütsüba dang masü saka nenok nüngtak angatetsü asoshi iba anogo ya nenok asoshi United Nations-i nüngtem shimteta amongba lir ta adenshia aliba tantsü tamburtem dang ashi.

Wt.Meyalemla-isa tantsür tamburtem dang nenok anema aser arishia alibaji alima asoshi akhümdong tulu lir, anungji nenoki nenok anema junga alitsü asoshi temang teti tendanga alitsüla aser nenok den apetba chiyungtsü peria achitsüla aser shisatsü merük merüka alitsü kanga dang

tongtipangta ta tantsür tamburtem ayongzüka jembi.

Kasa sentong nung Tsüngrem lenisüba jazüka Executive member Wb.Angumyapang-i sarasadem tenzüka den Anentzübo sector Chairman Wb.Supongtemsü-i tarur pela agizüka jembi aser tantsür tamburtem asoshi temoatsü meshija Kr.Imtimenla Asso.Pastor Women Süngkomen Baptist Arogo ajanga sarasadem Executive member Wb.Meyikimzik-i melepzüng o jembi aser Anentzübo sector Secretary W b . I m k o n g k ü m z ü k ketdangsüba nung iba sentong agioa teloki külemi sarasadema sentong tembang. Sentong nung adener tantsür tamburtem ajak nem Anentzübo sector yimdeni senpet kaka agütsü aser sentong nung medenteter nema ki tonga tsüngdong aogi iba senpet-ji agüja liasü.

Kohima nung mopung temürek indang video reel yanglutepba ayongzü



National Clean Air Programme 2024-25 kübok "Clean Air, Clean Future" omen nung ajemdaker video reel yangluba tetoktepba nung shilem agirtem den Deputy Commissioner, Kohima, B. Henok Buchem, NCS, ketdangsürtem aser GHHS Jotsoma nungi kaketshirtem külemi tangokba noksa ka yangi angur.

Dimapur, Mongputeni/Oct. 03 (TYO): National Clean Air Programme (NCAP) 2024-25 kübok "Clean Air, Clean Future" omen nung ajemdaker District Administration aser District Industries Centre for Information külemi video reel yangluba tetoktepba ka ayongzüka liasü.

Sempet agütsüba sentong ya Deputy Commissioner, Kohima indang Conference Hall nung October 3, 2025 nü Dr. Riku menden sür agia introductory round agia tenzüker aser shilem agirtemi tajangshiba lemsatepba session agia liasü.

Sensaksemba mapang mopung menenba ajanga temang nung kongshiba, ajak

asoshi mopung temürek lidaktsütsü mechi arok teinyaktsütem indang jembia liasü.

Deputy Commissioner, Kohima, B. Henok Buchem, NCS ajanga iba sentong nung jembidang, shilem agirtem dang clean air campaign asoshi ambassadors ama inyaktü ajungmesoa liasü.

Pai parnok dang iba osang ya prokshitsü ayongzüker aser iba ama inyakyim nung takok angutsü ya nübürtemi shilem agiba dak keta lir ta ashi.

"Akokba lenmang nung iba osang prokshiang. Greta Thunberg ama lenirtem nungi angazükang, temelenshi lidakjang aser Kohima

temürekba kumdaktsütsü asoshi temelenshi ji na südakjang," ta pai ashi.

Paisa lanurtem danga pei sempet aser tejangraba puteptsü ayongzüka liasü.

Iba reel yangluba nung nisung 16-i shilem agia online nung repranger 3.52 lakh dak tema kuma liasü.

Khumchöse-i mezüngbuba jenjang ngutet, Kevisetuo Keviu Rupreo-i tanabuba aser Seyielhounuo Keyie-i tasembuba jenjang nguteta liasü.

Maneni Jasmine, Margaret, Anu, Naomi, Kalpana Karki, Elly, Yatuonuo Usou, aser Rakovi Pohena nungeri consolation prizes angu.

Commercial establishment nung domestic LPG cylinders amshiba nokdang

Dimapur, Mongputeni/Oct. 03 (TYO): Mokokchung jila kübok shishilempadak tesem kar nung temelaba makai 'commercial' mapa asoshi domestic LPG cylinders (14.2 kg) amshiba osang angazüker, ta Mokokchung Municipal Council (MMC) sangdong ka ajanga ashi.

Liquefied Petroleum Gas (Regulation of Supply and Distribution) order, 2000 indang clause 3 (c) kübok domestic LPG cylinders ya domestic amshitsü atema dang lir ta shia lir aser Essential Commodities Act, 1955 indang section 7 (1) (a) (ii) kübok 'commercial' atema amshiba nokdang, ta nübürtem aser stakeholders ajungai metettsüla, ta ashi.

Anungji nübürtem kumzüka ayutsü mechi aser ozüng sülen

shidak anidaktsü mechi, hotels, restaurants, bakeries, tea stalls, canteens aser danga business densema Mokokchung Municipal jurisdiction kübok aliba commercial establishment ajunga nung authorized distributors ajanga agütsüba commercial LPG Cylinders dang amshitsüla.

Commercial atema domestic LPG cylinders (14.2kg) amshitsü khenyongi memelar.

Iba totuyuba nung aibelener nem Essential Commodities Act 1955 nung aliba ama merenshitsü aser establishment shibangtsütsütsü, senchi achitsü, trade permit agientsütsü aser ketdangsüri tapet ta angatetba mera agitsü. Anungji nisung ajaki iba totuyuba sülen anidaktsü metetdaksür, ta MMC sangdong ajanga ashi.

MSME-PCI Dimapur branch office semzükogo



Dimapur, Mongputeni/Oct. 03 (TYO): Advisor, Transport & Technical Education, Nagaland, Temjenmenba ajanga Hokulbarnü Orchid Square, Indisen village nung Micro, Small & Medium Enterprises Promotion Council of India (MSMEPCI) Dimapur branch office semzüksüoggo.

Iba sentong nung jembidang, iba yagi state tesem balala nungi lanur aser tetsür tem densema entrepreneurs akumtsü jangra alirtemi sorkar indang scheme balala agiba nung tongtipang apu laka

sendakteptsü, ta Advisor Temjenmenba-i ashi.

MSME-PCI ama lokti tentet medeni state sorkar kisüngi lanur tejangraba mataloktsütettsü, ta pai ashi aser lanurtem dang MSME-PCI ya item sentong tem nung shisatsü anguba tesem ka ama amshitsü ayongzüka liasü.

Iba sentong nung Deputy Commissioner, Dimapur, Dr. Tinojongshi Chang, NCS aser Dimapur Municipal Council, Chief Executive Officer, Thungchanbemo Tungoe nung tongtipang apu laka

'The Leadership Legacy: A profile of the Chief Ministers of Nagaland' sayaogo



Minister, Power and Parliamentary Affairs, Government of Nagaland, K. G Kenye-i September 30, 2025 nü 'The Leadership Legacy: A profile of the Chief Ministers of Nagaland' kakat sayatsüdang tangokba noksa nung angur.

Dimapur, Mongputeni/Oct. 03 (TYO): Minister, Power and Parliamentary Affairs, Government of Nagaland, K. G Kenye-i September 30, 2025 nü Nagaland Civil Secretariat, Kohima nung pa indang Office Chamber nung 'The Leadership Legacy: A profile of the Chief Ministers of Nagaland' sayatsü, koba Department of Parliamentary Affairs ajanga adoka liasü.

Department-i takok ngua asen Chief Minister tem takum

aser parnoki mapa tajung inyakba tushia iba kakat adokba asoshi Minister Kenye-i tenüngsang agütsü.

Iba ya ajanga lenirtem bilemteter, Nagaland indang yimten-yimsüsüba lenmang nung telungjem aser tasü ita nokdakba, Indian Constitution indang Article 371 (A) nung shia aliiba ama asen sobaliba aser yimsü-yimbong nung ajemdaker nübürtem dak rangloker sentong balala yanglua inyakba sayur, ta pai ashi.



October 03, 2025 nü Rashtrapati Bhavan, New Delhi nung Tir, Droupadi Murmu-i High Commissioner of Canada, Christopher Cooter ket nungi kulikaket agizükdang tangokba noksa nung angur.

Küm 2 ser tekübok tanurtem nem aket mozü mejemdaktsütsüla

New Delhi, Mongputeni/ October 03 (Agencies): Madhya Pradesh aser Maharashtra na nung tanurtem nem aket mozü jemdaktsüba agi tanur 11 asüba sülen Directorate General of Health Services (DGHS)-i arrshi küm 2 ser tekübokpur tanurtem nem aket mozü mejemdaktsütsü atema tekümdangtsü metetdaktsüogo. Madhya Pradesh state kübok Chhindwara district nung tanurtem nem aket mozü jemdaktsüba ajanga tezüngjang agi mapa meinyaki hopta ana tsüngda tanur 9 süogo. Rajasthan nunga tanurtem nem aket mozü jemdaktsüba

agi temang shilem kari mapa meinyaki tanurtem asüba osang lir. Madhya Pradesh nung aket mozü ajemba sülen asür tanur 9 rongnungji tanur 5 bo 'Coldref' aket mozü ajemba agi liasü aser tanur kabo 'Nextro' mozü ajemba agi asü. Sorkari nija doctor tem danga kanga kümdangtsü aser wara agi shirangertem Civil Hospital-i dang yoktsüla, ta metetdaktsü. State ana nung aket mozü ajemba agi tanur aika asüba sülen 'dextromethorphan hydrobromide' mozü tendang tenzükogo aser state tesem

ajaklen item mozü nokdangogo. Tang Madhya Pradesh nung yimra, temang metaba aser wara agi shiranger tanur 1,420 shi doctor temi temang tendanga reprangdar. Union Health Ministry-i, item mozü tendangba ajanga mozü nungji tezüngjang raksatsütsüsa Diethylene Glycol (DEG) mesüra Ethylene Glycol (EG) keta aliba meputet, ta metetdaktsü. Central Drugs Standard Control Organisation (CDSCO) aser Madhya Pradesh State Food & Drug Administration (SFDA)-i kasa osangji metetdaktsüogo.

PoK nung tensa mesüngjemba ya Pakistan ajanga lir: India

New Delhi, October 03 (Agencies): Pakistan occupied Kashmir (PoK) nung nüburtemi longkak aita nisung 12 asüba aser nisung 150 dak tali yirua tensa mesüngjemteti aliba ya Pakistan inyaksangshi ajanga lir, ta India-i aitsüogo. Honibarnü Ministry of External Affairs (MEA)-i, Pakistan nunger sepaitemi PoK nung nüburtem madak tashiyim amshir, ta metetdaktsü. MEA otongdar Randhir Jaiswal-i, "Pakistan-occupied Jammu & Kashmir nung Pakistan sepaitemi tai maket nüburtem dak tashiyim amshiba densema tesem aika nung longkak aitba osang onoki metetogo," ta metetdaktsü. Paisa, "Meimchir temeden anema inyakba atema alima

linüktemi Pakistan anema inyaktsüla," ta takhangba agütsü. India-i PoK ya India shilem ka lir, ta jembir. Taküm May ita nung India aser Pakistan na tsüngda raraba sülen India-i, iba litsü (PoK) tanaben India meyong akümtsü atema Pakistan den maneni jembitsü ta metetdakja liasü. Ano külen Pakistan-ibo tang PoK nung tensa mejungi aliba ya India ajanga lir, ta aitsür. Brihostibarnü Pakistan nunger minister Ahsan Iqbal-i PoK nung longkak aiteritem dang, "Asen tsükchir linük (India) tajangzük ngudaktsütsüsa asenoki mi metsükloksütsüla," ta metetdakja liasü. Pakistan sorkar dang akhangba onük 38 mataloktsüba agi September 29 nungi tenzüka

Jammu Kashmir Joint Awami Action Committee (JKJAAC)-i longkak aيتدang security sepaitem aser longkak aiteritem tsüngda raratepa nisung aika süogo. Yimtenren nung temelenshi, 'atta' aser electricity nung subsidies meshiba den külemi longkak aiteritemi PoK nung Kashmiri refugees atema lemozüksüba assembly menden 12 agentsü takhangba agüja longkak aiter. Tangbo PoK nung dang masü saka Islamabad aser Karachi na densema yimti aika nung nüburtemi longkak aitar. Hokolbarnü Shehbaz Sharif-i aniba sorkari tentetba committee ka Muzaffarabad yimtii oa JKJAAC den senden ka menogo.



October 03, 2025 nü New Delhi nung Union Finance Minister, Nirmala Sitharaman-i Kautilya Economic Conclave 2025 nung jembidang tangokba noksa nung angur.

Japan Transport Minister-i Surat nung bullet train yangluba tesem semdang

New Delhi, October 03 (Agencies): Hokolbarnü Union Railway Minister Ashwini Vaishnaw aser Japan Transport Minister, Hiromasa Nakano nati Gujarat kübok Surat yimti nung bullet train yangluba tesem semdangogo. Tesülen Railway ministry-i sangdong ka ajanga, Japan Minister-i iba tesem semdangba ajanga India aser Japan nati longjemer tang mezüing high-speed Rail corridor yanglutsü asoshi nendaka inyakba sayur, ta metetdaktsü. "Minister anati track slab laying car aser track slab adjustment facility na densema iba project dak sendakba maparen ajak asadangogo," ta railway ministry-i metetdaktsü. "Minister anapronglai teinyakdak maparen agi temelung kanga süogo aser kanga kera inyakba atema tenünsang agütsüogo," ta kasa sangdong ajanga metetdaktsü. India nung mezüingbuba bullet train project atema National High Speed Rail Corporation Limited nem mapa lemozükja lir. National High Speed Rail Corporation Limited-i ashiba agi, kilometer 508 talang Mumbai-Ahmedabad High Speed Rail corridor ji mezüingbuba asütsü, aser iba corridor ajanga

Maharashtra aser Gujarat na sendakteptsü. "Maharashtra kübok Bandra Kurla Complex (BKC) area nungi tenzükba sülen ghonda ka nung kilometer 320 tashi kera senzütetba bullet train service ajanga region nung yimtitem sendaktepba tsütsü temelenshi tulu adokba den külemi Mumbai, Vapi, Surat, Anand, Vadodara aser Ahmedabad yimtitem nung rongsenkettzüing jenjang-a ajungkettsütsü," ta NHSRCL nungi tongti ketdangser kati metetdaktsü. "High-speed rail connectivity ji ajanga industry aliba jilatem-Boisar, Bharuch aser Ankleshwar sendakteptsü aser Vadhvan Port den-a sendakteptsü. Iba train ji yimti 10 nung mapang tatsütsü anentsü; item yimtitemji Thane, Virar, Boisar, Vapi, Bilimora, Surat, Bharuch, Vadodara, Anand, Ahmedabad aser Sabarmati lir," ta paisa metetdaktsü. Mumbai nungi Ahmedabad atongtsü atema bullet train jagi ghonda 2 ser minute 7 shi agitsü, ta railway ministry-i metetdaktsü. Tawa railway minister Vaishnaw-i, India nung bullet train project ya 2029 küm tatembanglen tashi nungbo renemtsü, ta metetdakja liasü.



October 03, 2025 nü New Delhi nung osangbenertem senden ka nung Chief of the Air Staff, Air Chief Marshal Amar Preet Singh-i jembidang tangokba noksa nung angur.

Madhya Pradesh nung süngyanglu indokba mapang nisung 11 asü

Indore/Khandwa, October 03 (Agencies): Madhya Pradesh nung Khandwa district kübok tribal nütsüing teimba aliba Pandalphata yimtak Durga süngyanglu tzü nung inoktsütsü atema tractor trolley nung bener aoba mapang gariji awatsüing nung meküpa nisung 11 asü. Brihostibar aonung iba lendong nung asürtemji teimbaka tainlonglongpurtem liasü. Tantsülaaji arrshi küm 26 liasü aser tanutsülaaji arrshi küm 8 liasü. Iba yimdakji nütsüing 300 shi dang lir, aser iba nungjagi nisung 11 tashi asüba agi yimer ajaki mangyimer. Osangbenertem den jembidang yimdakliir Sawan Dangode-i, "Iba lendong atalokba agi yimdakliir ajak jashia mangyimer. Iba lendong nung tanur aika süadokogo,

ibayongji onok meyong tarutsü tia bener oadok ama onoki bilemer. Iba dak alia yimdakliirtemi administration danga kanga jashir, kechiyong parnoki jelia tekümdangtsü osang onok nem memetetdaktsü," ta ashi. Ajisüaka Dangode Khandwa District Magistrate Rishav Gupta-ibo "Brihostibar aonung onoki yimdakliirtem dang awatsüingji kanga tarok ta metetdakja liasü. Ajisüaka parnoki tashi mangai tractor trolley ji awatsüing telung jagi talangka ai. Ibayongji iba lendong ya atalok," ta metetdaktsü. Iba lendong atalokba osang angashia Ato kilonser Narendra Modi-i mangyim jashi lemsatep aser iba lendong nung asür kibong shia nem sen lakh anana aser yirur shia nem sen 50,000 teyari agütsütsü sangdong.



TIR YIMYIM YIMOBILEM (EDITORIAL)

DIMAPUR

KÜPTOKNÜ

MONGPUTENI 04, 2025

Asenok aluyimer akümtsüla

Alu nung züsentetba agidang taküm alitsüba ser nung asenoki aluyimertem ya teküpbok jenjang nung alirtem amai mezüngmeshia bilemer aser tejembia jembir. Aji oda, alu nungi züsentetba agidang takar akümer ser nung aluyimertembo ajak sensaker asütsü amai bilemer aser asenokibo ken nunga yamaji "Aluyimerbo temeimtsüka.." ta atener. Ajisüaka, asenoki jungjunga bilemdangra, aluyimertem sensaker asünung, kodaser alima nung alu mayimertem ajak peria chiyonger külenang anüngtsüsa chiyongtsü angutsü ? Atangji, alima nung chiyongtsü manguba purtema aika lir saka itemji alima nung aluyimertemi parnok dena achitsüsa peria mezüsentetba agi masü saka aluyimertem dang nungi alizüka alemertem, yimten nung ketdangsertemi junga malemba ajanga chiyongtsü makaba purtembo matong ser chiyongtsü aika tamajung kümer endoker. Aji oda, asenoki aluyimertembo tilar, sensaker aser teküpbok jenjang nung alirtem ta bilemba akhi tejen shisatsü endoker, aluyimertem malibo asenok taküm melitetsü ta asüba tangatetba tasen kati arur, asenok ajak aluyimer akümtsüla. Atangji, asenok aikati alu tululubo meyimtetsüa akok, saka asenoki asenok akok aser asenok peri danga yimtetra, iba jagi asenok tebok sünga alitsüba dang masü saka asenok taküm aser temang asoshi tajangzük aika angutsü. Tanü asenoki aluyimtsü nung temulung magütsüba ya aluyimertem luja jembiba agi dang masü saka alu mayimyonga dokan nung kechi chinüdir ajak angur, anungji aseni alu ayimba dang nungibo dokan nung alia chiyongbaji dalangba adoker ta asenoki bilemer. Ibaji asenoki dokan nung alia chiyongba chiyongtsütem nung asen temang nung tashidak kaotsüsa aliba tamajungtem indang memetetba ajanga lir. Aji oda, tanü asenok alidak shishilembadak jang nungi shir shi ango aser antsü ajak tangalen nungi bener arua ayoker. Kasaji, aonsutsüa tangari züsentetba dang achir. Item jangotsü, shi aser antsü aser aonsutsü ajungaji yakta-yakta tululu küma aientsü asoshi mozü agüja anepalur, anungji aluyimer ishikati alima nung alir ajak chiyonger anüngtsüsa alu yimteter. Iba amaji mozü amshia ayimba lu nungi züsentetba chiyongtsü ajak nung item mozüji ia lir, anungji asenoka aonsutsü yakta tulu küma aienba amaji yakta tulu aser tain kümadoker. Aji dang masü saka temang nung asenoki achiba chiyongtsü nung chisemba tashidak agi asenok kangshir. Aji oda, alu nung tsük, jenjang menjang aser aonsutsü ajak karaa tulu küma aientsü asoshi agütsüba mozütemji dang masü saka shirurui motong aser aonsutsütem machitsü asoshia mozü amshir, iba jagi alu nung aonsutsütem nem teyari tajung agütsüba mesen dena asür. Iba ama mozü amshiba ajanga aonsutsütem ajak tarak maket süsüsüsüa atangba asenoki angutsü. Alemli asen tsüraburtemibo alu aser arem nung süngolemba aser süngjanglijangtem nung ozü sangnutemi achiba aser metepba tarak melira machi, kechiyong item chiyongtsütemji temang atema majung ta takzü. Tanübo asenok dak item takzütakpong kecha mali aser memetet, anungji asenokibo aonsutsü aser süngjanglijang ayokdak tarak maket topur tajung süsüa alibatem dang shishia alir. Iba amaji asenoki bazaar nung chiyongtsü tajung tajung shimer masü saka tashidak aketba chiyongtsü shima-shima alir akümer. Item timtem lendong nungi jenbutsü atema asenoka asenok peribo aonsutsü dang masü saka chia dena asen lu nung züsentetba chiyongtsüsa alu tilalabosa ayimtsüla. Iba jagi asenoki temang junga lidaktsüba dang masü saka asen lima nung tsük aser aonsutsü metsütem mesamatsü aser alu ayimdangji Ao oshi dena renloktsü, kechiyong aluyimba mapang jembitsüba asen oshi nung ojang aika lir saka asenoki alu mayimba agi item ojangtemji jembitsü nüngdak madoker aser mejembiba agi oshiji tesamalen i aoer. Item nüngdaktem dakji alaka, asenok yimten aser lokti nung nüchi akümtsü asoshi asen lu nung asenoki züsentetba chiyongtsü agi asenokbosa peritetsüla. Atangji, tanübo alu ayimyonga teka raksaa aser tetsüng teben nung merila agi metepdakja inyaktsüba masü saka hand gloves, boots, rain coat aser korang tulu semer inyaktsü bilemdi.

OLEMSABANG

Ao Ojang Ana nung Oralok

T. Meren Paul, Lower PR Hill, Kohima

(Yashi adok nungi...)

Mesem - tzü bendena ayu, tesem ka merüktet, kimung mesemtet, jenmung mesemtet, Mesemrü- tezü nung atangba aonsotsü tapu ka, teküp aser tejang achir.
 Mesemtet- jungjunga renema yangluteta ayuba
 Mesemtet- Tola, süoshi, tsüngsem mesemtetba
 Mesemzük- talitsü asoshi ki merakteta meshiteta mezüng ayaokba
 Mesemzük- tola süoshi temang nungi magizükba, korang, tsüngsem mesemzük
 Mesen ojang nung tejaklen bendenlokba ojang kar
 Akmesen- nüma madang, tangar sentsü majeter
 Akmesen- ak indang temesen
 Azümesen- mapa kecha meinyaknü, kazüa dang linür
 Azümesen- azü indang temesen
 Liangmesen- liang, nguplong, ngupty dong nungi aluba süngtsü akongba, myrrh, resin
 Lonmesen- lon chia tzü ajemba
 Nashimesen- nashi indang temesen
 Temesen- poknong shilem ka, lever
 Tenarongmesen- temeyong agi tenarong talak nung amer perepba
 Tenepongmesen- temeyong agi tenepong nung amer perepba.
 Tzümesen- süoshi nungi tzü mesendoka endokba
Mesen ojang nung tesülen bendenlokba, source Er. Lanuakum Omolu nungia densema.
 Mesen- teret maket shiruru tila, germ, maggot
 Mesen- meinprong, nagging
 Mesen- süngzü/lisü mesen
 Mesen- Temeyong agi tenepong aser tenarong nung perepba, mesenba
 Mesenbo- sabua mali, yongyaa mali, aginüa maiter
 Mesendak- sendaka mayu
 Mesendang- ana kuma perepdang
 Mesendem- oset tejen saka jedema sendema maküm
 Mesendem- tzü senzüka yangzüka malumah
 Mesendem- nisong sena aruba manen arujen arur
 Mesenden- arutsü ayongtep saka maru
 Mesenden – inzü aika abitepa ayu
 Mesendok – süoshi nung tzü tüma aliba mesendok
 Mesentok- sendoka matok, temiem mesamah
 Mesenjang- inzü palala aliba ka kuma mesentepjang ta ashiba
 Mesenjung- mapang meperiba agi tsük mesenjung, pongsen mesenjung
 Mesenlok- tzü aruaka ayong nung tzü mesenlok, wanga matu
 Mesenlok- süngzü pailok, mesenlok
 Mesenmah- tzük asenba ano mesenma
 Mesenmah- nisung telok tulu sena aruba anu maneni arur, marumaher
 Mesenmesen- mesen onsara aika aliba, tereprangtsü mesen mesükba
 Mesenmetu- küta sena mali, meima mepenshe
 Mesenok- kilem tapok liaka kilongi tzünglu masen, mesenok
 Mesenra- sü tayi tashi agi mesena tzü mesendok
 Mesenra- tsük junga mesenra
 Mesenra- tasen (sour) agi matu,
 Mesenra- pongsen junga mena masen
 Mesenrep- süoshi shidoker tzü mesendoka mesenrep
 Mesenrep- tilaba kümadakja mesenrep
 Mesenrep- pongsen asenba arema lua eshiba küma mesenrep
 Mesenprong- jangjongaraba, meinprongba
 Mesensa- nisung tajungi tangar nüng mesensa
 Mesensah- süngzü/inzü pereptepdang aika perepsah, raksah
 Mesensah- temeyong agi chiyungtsü mesenteta lemsah
 Mesensah- shiruru tepsetba ano melepsa temang rangben
 Mesensak- sensaka mali, anüngaponga malir
 Mesensem- langka pereptepdang tanga oseta densema mesenlok
 Mesensen- takup rarkraka maitba, atidaka maitba, matenshiba
 Mesenshe- temang kenyongi marakzüi tangua mesashi-i aliba
 Mesenshi- senshia, perokshia maoba
 Mesenset- ozü sangnu, shiruru tila tekong perepseta südaktsüba
 Mesentep- shingadenah kulemi masü
 Mesentep- atenshitsu jatep saka shinga maru
 Mesentep- lisü/süngzü aika mesentepa talangba kumdahtsü
 Mesentep- küttepa, sentepa jungtepa aliba tatem akum
 Mesenteptet- sendentsü ayongtepba yangbong mesüi mesenteptettsüsa akum
 Mesenteptsü- senteptsü aliba songdem, nongdem, tihdem
 Mesenteptsü- inzü perepteptsü
 Mesented- temeyong ana aki langka mesena aroa agitetba
 Mesenzü- nisung shinga olia masüba
 Mesenzük- tesem ka nungi merang inzü mesenzük
 Mesenzük- tzü wai nung senzüka endokba, sieve
 Mesenzük- tape (faucet) tangtanga yua aliba lapoka tzü agizükba
 Mesenzük- telok ka tesem ka nungi senzüka ano malu
 Mesenzük- tsük ano mesenzük, mesenmah, maneni sendar

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Prison Fellowship International-i Laishiba 620,000 lema agütsütsü



Prison Fellowship International nungi Frank Lofaro aser Bible League International nungi Jonathan Adams nati 'Partner Agreement' nung sign asü dang tangokba noksa nung angur.

October 03, 2025: Prison Fellowship International aser Bible League International nati taruba küm pongu tsü ngda linük 20 nung tepuokdak alirtem nem Laishiba 620,000 lema agütsütsü atema tenangzü kba ka agiogo.

2019 küm Prison Fellowship International aser Bible League International nati partnership yangluba dak sendakba nung iba mapaten atemzü k. Parnoki

Prison Fellowship International indang in-prison program, The Prisoner's Journey renemertem nem Laishiba 570,000 bo lema agütsüogo. Iba program ya alima tesem balala nung jail 700 dak tema nung puoka alirtem atema ayongzü ka katsür. Tepuokdak alirtem nem Khristan tamang angatetdaksütsü nü kjidong nung parnoki inyaker.

Oshi 8 nung Laishibaji jail

nung alirtem nem agütsür. Iba nungji study lesson 52 densema lir, aser item onüktem rongnung jail nung alirtemi ajangshiba timtem balala koktettsü onüktem densema lir.

Tang Bible League International-ia program graduates-i nü ngdakba Laishiba shilem 70 bo agütsür.

"Iba partnership kü bok inyakba ajanga tepuokdak alirtemi in-prison programs ajanga Yisu meteta akü mer aser Laishiba azü ngba ajanga tanela nung ainer," ta Fellowship International nung Global Impact tatong tir, Frank Lofaro-i metetdaksü.

Tepuokdak alirtem aser parnok kibongtem yaritsü nü kjidong nung ministry partners aikati 1979 küm Prison Fellowship International ya tenteta liasü.

Bible League International ya 1938 küm tentet aser parnoki alima tesem balala nung Laishiba resources agütsüba den kü lemi Arogotem nem training agütsür.

Evangelicals 45%-i dang Yihuda nunger ya Tsü ngremi shimba nü bur ta bilemer

October 03, 2025: Arrshi küm 35 ser tekü bokpur Evangelical Khristanem aikati Yihuda nunger ya Tsü ngremi shimtetba nü burtem masü amai bilemer, ta survey tasen ka ajanga bushitet.

Infinity Concepts aser Grey Matter Research nati tawa "Crossroads of Belief: Evangelicals and Jewish People" ta ser report ka sayago. Yihuda nunger dak sendakba nung Evangelical Khristanem tangatetba metettsü atema iba survey agia liasü.

Taküm küm tetenzüklen iba survey ya agi aser iba survey nung Evangelical Protestant 1,008-i shilem agia telangzü ba agütsü.

Iba survey nung shilem agir 49-i dang Yihuda nungertem ya Tsü ngremi shimtetba nü burtem ama bilemer, ajisü aka arrshi küm 35 ser tekü bokpurtembo shilem 29-i dang Yihuda nungertem ya Tsü ngremi shimtetba nü burtem ama bilemer.

Arrshi küm 35-44 tsü ngdapurtem shilem 50-i Yihuda nunger ya Tsü ngremi shimtetba nü burtem ama bilemer, arrshi küm 45-54 purtem-a shilem 51-i yamaji bilemer, arrshi küm 55-64 purtem-a shilem 55-i yamaji bilemer, ajisü aka arrshi küm 65 ser temapurtembo shilem 56-i Yihuda nunger ya Tsü ngremi shimtetba nü burtem ama bilemer.

Ano arrshi küm 35 ser tekü bokpurtem shilem 26-ibo 'Replacement Theology' nung amanger. 'Tsü ngremi shimtetba nü burtemji Yihuda nunger liasü saka Yisu Khrista asoba sü lenbo Tsü ngremi shimtetba nü burtemji Khristanem lir' ta amangba dang Replacement Theology ta ajar. Israel pusemer Evangelical lenirtembo aikati 'Replacement Theology' ya tai tesayuba lir, ta aitsür.

Iba survey nung shilem agir shilem 26-ibo Yihuda nungerji Tsü ngremi shimba nü burtem asü masü ar parnoki memetet ta ashi, aser shilem 16-ibo Yihuda nungertem ya Tsü ngremi shimtetba nü burtem masü, ta telangzü ba agütsü.

Iba survey nung shilem agir shilem 55-i "Shin o nung Israel shilem ya tongtibang" ta ashi ajisü aka arrshi küm 35 ser tekü bokpurtembo shilem 45-i dang shin o nung Israel ya tongtibang ta ashi. Ano arrshi küm 35 ser temapurtembo shilem 65-i shin o nung Israel shilem ya tongtibang ta ashi.

Research agirtemisa shin o nung Israel shilem dak sendakba nung tongtibang onük 7 nung Evangelicals tangatetba asadanga liasü. Onük tenetji, "Shin o nung Israel shilem," "Laishiba ajanga Israel indang kechi tesayuba agütsür," "Khristan yimsü nung Yihuda tera," "US aser Israel tsü ngda yimtenren tesendaktep," "Yihuda nunger sempaba asü Yihuda nunger sempaba anema

nokdakba," "US nunger osangkakettem nung Israel osang koma proker," aser "Israel nungertemi US Khristanem koma repranger" onüktem liasü.

Iba survey nung shilem agir 44-i onük tenetpronglaji tongtibang ta ashi saka arrshi küm 35 ser tekü bokpurtem shilem 31-i dang item onük ajakji tongtibang, ta ashi. Arrshi küm 65 ser temapurtembo shilem 62-i item onük ajakji tongtibang, ta ashi.

Infinity Concepts CEO, Mark Dreistadt-i sangdong ka ajanga, "Lanur evangelical teimbakati tanga onüktem nung rangloker, aser Israel dak sendakba nunga parnok tangatetba balaka akü mba bushiteter," ta metetdaksü.

Dreistadt-isa, "Item tebushitetba ajanga Laishiba nung ajemdaker Israel aser Yihuda nunger indang tesyauba agütsüba ajanga putu balala nung asortem sendaktepja nü tsü ngtsütsü nü ngdaka akü mba bushiteter," ta metetdaksü.

Grey Matter Research Consulting Tir, Ron Sellers-i, "Lanur Evangelical aikati Israel kangabo mesü kshir, Israel pu-masemer aser Yihuda nungertem ya Tsü ngremi shimba nü burtem masü ama bilemer. Parnok tain akü mdang iba tangatetbaji memelenshira tarutsü nung Israel aser Yihuda nunger dak sendakba nung Evangelicals tangatetba kanga melenshitsü," ta ashi.

ANO GO ABEN TSÜ NGREM DEN

Ain, Tetsü bu Masü

"Kechiyong, Tsü ngremi asenok nem tetsü bu tanela masü, saka ain aser tazü okba tanela agütsü" 2Tim 1:7.

Tsü ngremi Khristan taküm kati tsü bua alitsü ajungshibaji, Pa tsü bua alitsü ajungshi (2 Kor. 5: 10- 11; Ibri 10: 31) dang ajungshi. Nisung tsü bubaji Tsü ngrem nungi aruba tetsü bu masü. Khristanem asoshi tebilemtsü ji nisung tsü bubaji lir. Nisung tsü buba jagi Tsü ngrem peladaksütsü nokdang, kechiaser nisung tsü buba nung parnok tashi ajak lalur.

Timoti asangur ka liasü (1Tim 5: 23). Pa temang nunga tashi mait liasü. Timoti Paul mapang shia obendangdaki aoba aser rishikangshiba metetta liasü. Pauli Timoti dang nisung tsü bubaji Tsü ngrem nungi aruba masü, ta ashi. Tetsü bui Tsü ngremi asenok dang kechi ashi aji Pai asü ngdangtsü tsü budaksütsür. Rishikangshi marudang nai Tsü ngrem dang tashi anga lidagi ta bilema alitsü akok, saka kodang rishikangshi aser timtem arudir nai tashi angaa aliba nung nü sasa ratatsü akok. Tetsü bu timba memetetba tetsü bu lir. Asenok jakdang kechi lir aji asenoki memeteter anungji tetsü bu agi asenok puadaksür. Asenok tebilemba agi asenok nangpangdaksür aji asü nung asenok tangatetba nü ngdaker. Asen meketa kechi inyaker aser kechi ataloker itemji asenoki angatettsü tenü ngdaksü. Aji agi, Tsü ngremi angatetba ama asenoki angatettsü aser Pai anguba ama asenoki angutsü asoshi Pai asenok nem Tanela Temeshi yok.

Tetsü bu agi Tsü ngrem dang tashi mangatsü ba masü. Tanela Temeshi asenok den ali tashi asenoki tsü bua alitsü menü ngdak. Tetsü bui na alar kü mdaksür, saka na nü ji kü mdaksütsü asoshi Yisu aru. Tetsü bu nungi anitettsü aser ne nü k lapoktsütsü Tsü ngrem dang asü ngdangang. Pai ne tia jungkai adoktsü ba den nai maneni tashia anga alitsü Pai ain agütsütsü.

Oshi tasen aika nung Laishiba meyipzü kba mapakanga kera inyakdar

October 03, 2025: Wycliffe ajanga, tesü iba küm 1 tsü ngda Bible Translators nung Laishiba rangben mesü ra Tasen Executive Director, James Lai oshi tasen 118 nung Poole-i, oshi tasen aika nung renemogo, aser ibaji anogo Laishiba meyipzü kba maparen asem shia Laishiba kaka renemba den kasa lir, ta medemdangra tangbo kanga metetdakja liasü.

Item Laishiba rongnung Lashiba rangben (Tejen Lai & Tasen Lai) 23 aser Tasen Lai 95 liasü. Küm ka kija nung oshi teimtiba nung Laishiba meyipzü kbaji 2024-25 küm liasü.

"Aso (century) aika nisung billion aika ket nung pei oshi nung Laishiba tekong kata maliasü, ajisü aka iba otsü ji tangbo melenshidar," ta Poole-i ashi.

Ajioda sü aka tang alima nung nisung 5 shia nisung ka ket nungbo pei oshi nung Laishiba mali, aser pei oshi nung Laishiba maliba nü tsü ng billion 1.5 lir, ta Wycliffe-i metetdaksü.

September 30 nü International Translation Day anogomong nung Wycliffe Bible Translators-i sangdong ka

AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim

Tilu

(v) atala, menütsü (mock)


* Lokti nung medemertemi ni kanga tilutsü.

Tilubanglu

(adv) tangar mezüngmeshia atalatsüba (redicule, discrediting)

* Tangar indang tilubanglu o mejembitsüla.

OLONG PAITEP # 7289



TIPIEN

- | | |
|--|----------------------------------|
| 1. Tangar tenzüka alir - (5) | 2. Ola tashii madok - (4) |
| 5. Ibai shi asodang inoktsü junger - (6) | 3. Aikabo masü - (3) |
| 7. Nung ta asüba inyaknüsang - (6) | 4. Ter nung ti endok - (3) |
| 11. Tesem - (4) | 5. Tejakleni masü - (9) |
| 12. Süngjang o temechi na tsünga - (4) | 6. Akhidang chiyungba auso - (6) |
| 15. Meyipa ashi - (6) | 8. Angateta aru - (5) |
| 17. Ako - (6) | 9. Amangbapur tentet - (5) |
| 18. Mi aplok - (5) | 10. Shi nung masü - (6) |
| | 13. Junga tashi maküm - (4) |
| | 14. Remdak - (3) |
| | 16. Tanaben tenzük - (3) |

OLONG PAITEP # 7288 TELANGZÜBA


TIPIEN :

1. Taa, 3. Teküm, 6. Aibelen, 7. Aut, 9. Ajizük, 10. Ojala, 11. Semer, 13. Sen, 15. Kioktsü, 17. Itsük, 18. Kar.

LANGTSÜNGLEN :

1. Tai, 2. Asensor, 3. Tanü, 4. Kua, 5. Mitsüktsü, 6. Azübenshi, 8. Lah, 9. Jangkok, 12. Akok, 14. Nashi, 16. Sür.

NAI-A YA METETTER MA



Border Roads Organisation (BRO)-i maneni alima nung "highest motorable road" otsü yangluogo. Ladakh kübok Leh district nung Mig La Pass nung tzüyimma nungi anünglen 19,400 feet ajungketer highest motorable road yanglu. Project Himank atema Chief Engineer Brigadier Vishal Srivastava-i October 1, 2025 Mig La Pass nung Indian aser BRO flags atsüketa liasü.

Manipur nung CKMA tanishir ka dena telungpur 4 apu



Imphal, October 3, 2025

(Agencies): Manipur nung sepaitemi Chin Kuki Mizo Army (CKMA) "commander-in-chief" dena telungpur telok balala nungi züngsem pezü puogo.

Bodbarnü Churachandpur district kübok S Munuam nungi CKMA tanishir Paokholen Guite apu ta police-i ashi.

Paokholen-i India-Myanmar arrtsü ajanga prangpong-injang aser drugs

shibelenba nung tongti shilem agi. Pa ket nungi AK-47 rifles 2,181 rounds, Rs 1 lakh cash aser gari ka ngutetogo.

Ano, tatalokba balala nung ozüngi noktanga aliba People's Liberation Army (PLA) züngsem ana apu. Tena ya Imphal West district kübok tesem balala nung apu aser tenati brick kiln kiburtem aser lendenlen public dang nungi tashiyim agi sen meshia senzüba

atema tai tonglokja lir.

Maneni, Thoubal district kübok Yairipok nung PLA züngsem ka par kidang nungi apu. Iba nisung yagi quarry mapa inyaktertem dang nungi tashiyim agi sen meshia agiba atema tai tonglokja lir.

Taoba ita Bishnupur district kübok Nambol Sabal Leikai nung PLA züngsemtemi Assam Rifles convoy amakba aser iba lendong nung AR sepai ana khaset.

Mizoram nungi Rajdhani Express 160% occupancy atong



Aizawl, October 3, 2025

(Agencies): Mizoram nung Bairabi-Sairang railway line lapoker ita ka jungnüa arudang passenger aser freight services kanga junga senzür ta Railway Ministry-i metetdaksü.

Prime Minister Narendra Modi-i September 13 nü 51.38-km talang Bairabi-Sairang railway line lapokja liasü. Iba anogo pai Sairang nung mezüngbubua Delhi-i aoba Rajdhani Express tenzüktsü.

Iba lenmang ajanga

passenger connectivity akangshiba dang masü saka Northeast nung shishilembabaren aser mapa atema maangka aika lapoktsür ta ketdangsürtemi ashi.

Sairang-Delhi Rajdhani Express nung passenger trains nung nisung mesemi senzür aser inaugural run nung 162.5% occupancy aser return journey nung 158.3% liasü.

Maneni, Guwahati-i aoba Sairang-Guwahati Express nunga 100% occupancy liasü

asert return journey nung sleeper class ajunga book asü ta ketdangsürtemisa ashi.

Külen, Sairang-Kolkata Express nunga 100% occupancy aser Kolkata-Sairang train return nung 144.8% occupancy liasü.

September 30, 2025 tashi nung Sairang station nung eight rakes unload asü aser iba nung cement, stone chips, sand, automobiles, aser ready-mix concrete dena liasü.

September 19 nü Rajdhani Express parcel van ajanga Mizoram nungi Delhi-i Anthurium flowers bener yoka liasü.

Nagaland kübok Molvom nungia freight operations tenzükogo aser iba ajanga Northeast nung shishilembabaren atema maongkatem lapoktsüogo ta Railway ketdangsürtemisa ashi.

Kuki-Zo village chiefs-i 'total non-cooperation' metetdaksür

Imphal, October 3, 2025

(Agencies): India sorkari Indo-Myanmar arrtsü atsü dangtsü mapa anema "total non-cooperation" tenzükur ta Kuki-Zo village chiefs 16-i metetdaksüogo.

Onoki yimtenren tsütsü akhangba onüktem melangzü aser Manipur nung yimjung maru tashi iba atema land compensation mesüra negotiations kecha malitsü ta parnoki ashi.

"Iba ya sen atema masü, iba ya onok temetentem, ali aser onok liyonga aotsü atema lir. Free Movement Regime (FMR) agienba aser arrtsü atsü dangtsü merangba magizükur kechiyong iba ajanga onok maitsü, senzusenbong aser alemli nungi ali madak kibur süa aruba nung kongshir" ta Kuki-Zo village chiefs-i ashi.

Kuki-Zo nungeri sangdong agütsüba, memorandums

züluba aser rally tem ayonga agiba mangur. United Naga Council (UNC)-ia kasa tebilemtsütem lemsatopogo aser sorkar ketdangsürtem den ajurutepdang telemtetba ka magiteti lir ta parnokisa ashi.

Iba non-cooperation policy kübok onoki land compensation magizüktsü, olemtep nung madentsü mesüra tang atsü atsü dangba magizüktsü ta village chiefs-isa metetdaksüogo.

Diplo-i Shillong Cherry Blossom Festival nung shilem agitsü

Guwahati, October 3, 2025

(Agencies): Shillong Cherry Blossom Festival nung three-time Grammy winner Diplo-ia shilem agitsü ta October 3 nü tayongertemi metetdaksüogo.

Shillong Cherry Blossom Festival ya India nung music events tulutiba rongnung ka lir. American DJ & producer

Diplo-i Jason Derulo, The Script, aser Nora Fatehi nunger den külemi shilem agi.

Iba benjung ya November 14-15 anogotem Shillong JN Stadium aser Polo Grounds nung amungtsü.

Taoba nung Diplo-i Bollywood star Shah Rukh Khan den külemi inyaksemo.

Jab Harry Met Sejal film nung Diplo-i music produce asü aser "Phurr" ken video nung shilem agia liasü.

Shillong Cherry Blossom Festival tenzükba sülen iba benjung tuluba munga arur aser yaküm Wow Asia nung Gold Awards pezü angu aser taküm Festival of the Year naroküm nguogo.

Europe mitkar tashi itshiba nung telangzüba agütsütsü: Putin

Sochi, Mongputeni/Oct. 03 (Agencies): Europe mitkar tsütsü tashi itshiba nung telangzüba tejangja agütsütsü aser ozü linüki NATO amaktsü ta o tali bendenloka jembiba ya tetetzü maka, ta Russia Tir Vladimir Putin-i ashi.

"Russia-i NATO amaktsü ta parnoki ashiba nung parnokia mamanger. Parnoki shidakba nunga amanger asünungbo parnoki parnok dak khenyongi temulung melemteter, kechiaser iba tetetzü makaba nung amangtsü ya tamakoktsü, mesüra parnok ochi mashir dang lir," ta pai Brehostibarnü Sochi yimti nung foreign policy forum ka nung ashi.

Europe indang mitkar asendenshiba mechi Putin-i tezü adangba lemsatep aser pai iba yimya kanga junga repranga arur aser telangzüba mera kanga kera agitsü, ta ashi.

"Tatishitsü agi Germany nung, German army ya Europe nung tashi taitba akumtsüla ta ashir. Kanga junger. Aji onoki angashir aser iba tetetzü kechiar onoki repranga atar," ta Putin-i ashi.

"Russia-i kodanga tashi mait mesüra rata-mata mesayutsü. Kechi ataloker, aji asenoki senzüka metoktsütsü," ta ashi.

Moscow-i 2022 küm Ukraine amak tenzükbä sülen Russia aser European Union tsüngta tesendaktep kanga mejungi kumogo, anungji bloc

ya defence lenmang balala bushia ulushir.

Denmark anünglen drones yimzüba aser Moscow nungi Estonia aser Poland telungi anünglen temelaba makai tayimtsü aitba ajanga Russia indang rara ya Ukraine arütsülen prokshia aotsü ta tali tsüboteper.

Russia-i dangar linük indang airspace telungi aitba ya asaa inyakba lir ta Ukraine ketdangsür aser NATO linük kari ashir. Saka Moscow-i iba taitsüba magizüker aser European linük temi tamendak dak makai tai tongloksür ta ashir.

Mitkar tsütsü senotsü tali indokba medentsü atema Europe-i puraloka jembir ta pai aitsü aser Russia ya timtem ka mesüi liasü ta ashi.

"Odang süngzükang," ta Russia tiri ashi.

Ukraine nung yimjung takok mongutetba ya European linüktemi tanen makai tensa tamajungba kumdaktsütsü tasa ajanga lir, ta ashi.

"NATO linük ajunga asenok den rarar, aser tangbo parnoki aji matsükshir. Itdangiter osang prokshia aser nok-nü agüja parnoki combat operations nung shilem agir," ta Putin-i ashi.

Brehostibarnü jembidang Putin-i United States Tir Donald Trump tenüng sanga, August ita Alaska senden alidang Ukraine nung raraba

angattetepsü aser linük ana tsüngta tesendaktep akhi ama yanglushitsü indang jembi ta ashi.

"Trump ya dangari jembiba angaba nisung ka lir," ta Putin-i ashi. Trump ya January ita US tir akumba sülen Ukraine nung rara tatembang kati arudaktsütsü meranga arur.

Moscow-i tang tashi Ukraine den jembishinü akatsü tejangraba mesayur aser maneni par taginüba akhanger, kong Kyiv-i NATO nung züngsem akumtsü merangba anentsü aser alinük tesem kar yutsütsü dena lir.

Kasa mapang Ukraine-i lendong asaya ka asayaa Russia kübok aliba Zaporizhzhia Nuclear Power Plant anasa amaker ta Putin-i ashi aser tayang kepzüka Ukraine kübok aliba nuclear plants amaktsü ashi.

Europe nung nuclear power plant tulutiba nung hopta ka dak tema external powers shibanger emergency diesel generators ajanga mokongdaktsür. Iba tesem amakba aser external power shibangba atema Ukraine aser Russia linük ana tsüngta tenüng senteper.

"Par tsütsü tang tashi mapa inyakba nuclear power plants lir. Kechiba asenoki yamala nung telangzüba magütsür? Iba indang parnok nem bilemdaktsüti," ta Putin-i ashi.

Pakistan-i Trump indang Gaza yimjung sentong senzüka yutsüogo

Islamabad, Mongputeni/Oct. 03 (Agencies): Gaza nung yimjung alitsü asoshi US Tir Donald Trump-i point 20 sentong ka sangdonga aliba Pakistan indang Deputy Prime Minister aser Foreign Minister Ishaq Dar-i senzüka yuja, parliament nunga iba document ya asenok indang masü aser Muslim nunger timba sür aliba linük temi mezüng benokba asen draft nung temelenshi lir ta ashi.

Iba yongji Trump sentong nungi pei sasa pila aoba linük tulu rongnung Pakistan ya mezüngbuba akumer, koba Hamas nungi telangzüba marudang yongi inyakba lir.

Ceasefire alitsü, pua alirtem aser tepuokdak alirtem melenteptsü, Israel sepaitem ainshitsü, Hamas-i nok-nü yutsütsü US sentong yimjak nung sangdonger anogo ishika tsüngta iba sentong magizükba ya temai adok.

Pakistan Army Chief, Field Marshal Asim Munir teyari nung iba policy mapang meindoki magizüker ta osang ajanga ashir, anungji US-Israel teyari nung yangluba framework anema mitkar akang-akanga nokdaka aliba sayur.

Itdangiter osang ka ajanga ashiba agi, Pakistan-i Hamas lenir dang iba sentong magizüktsü ajungshia osang ka

sangoktsütsü amai lir. Yimjak nung iba sentong nungi pila aoba ya Pakistan sorkar asoshi nüngdakba mera ka ama angateter. "Trump sentong, asen indang masü" ta yimjak nung jembiba ya tenüng wazüka ayutsü mera ka ama lir. Iba framework nung parnok shilem mali ta sangdongba ajanga Islamabad ya US-i anir inyakba yimjung maparen nung mapudaker ama repranger.

Pakistan nung Palestine bhukuma tasa balala asayar aser Islamist political party temia Israel tajangzük angutsüsa tezüngzüktep kecha meyanglutsü ajang-ajanga nokdaka lir. Hamas-i nok-nü yutsütsüba sentong ya Pakistan nung radical telok tem imager. Anungji Dar-i jangjashitsüba ajanga item tashi tait telok tem dang sorkar ya US mangdang den kasa masü ta sayur, anungji yimtung nung longkak aittsü aser yimtenren tsütsü aitsütsü aliba nungi jenbur.

Maneni Islamabad-i hardline Arab linüktem mesüra region nung tashi tulu aliba Iran-i Muslim nunger asoshi inyakba yoka chiogo ta aitsüba nungi jenbutsü meranger.

Yimjak nung yamaji sangdongaka Pakistan-i jembishinüba nung Washington aser Arab linük balala den külemi nokdaktsü ama itdangiter osang ajanga ashir.

Israel-i Gaza nung nisung aika tepset, Hamas-i Trump sentong asadanger



Deir Al-Bahal, Mongputeni/Oct. 03 (Agencies): Israel-i amakdang aser prangbong agi khatepba mapang Gaza Strip nung Palestine nunger nisung 57 asü, ta health ketdangsür temi Brehostibarnü ashi aser US Tir Donald Trump-i küm ana jungnüa raraba tembangtsü asoshi sentong ka benokba Hamas-i tang tashi asadangba mapang lir.

Iba sentong nungya Hamas-i pua aliba nisung ajak (48) chioktsü shia lir - parnok nisung 20 shi tang tashi takum lir ta Israel-i ashir - nok-nü yutsütsü aser iba melen Palestine nunger tepuokdak aliba nisung noklang aika chioktsü aser rara tembangtsü. Israel Ato Kilonser

Benjamin Netanyahu-i iba sentong ya agizükaka, yangji Palestine linük temeja ka kumtettsü asoshi lenmang sayua mali.

Palestine nungeri rara ya tembangner, saka iba sentong ya Israel tsütsü tejak shia lir ta aikati amanger, aser Hamas ketdangsür kati rasaa meshiaka kar magizüktettsüsa lir ta ashi. Iba rara tembangtsü asoshi tetsüngtai ia jembir Qatar aser Egypt natia iba sentong nung keta aliba kar tali jembishitsü nüngdaker ta ashir.

Gaza south tsütsü Israel-i injang khaloktsüba nung nisung 29 asü, ta Nasser Hospital ajanga ashi, kong item tasü mang bener arua liasü.

Yangji aliba ketdangsür temi ashiba agi, parnok nisung 14 bo Israeli military corridor nung tepset, kong humanitarian aid lema agütsüba tesem maketa mapang shia injang khashishiba lir.

Deir al-Balah yimti tiyonglen aliba Al-Aqsa Martyrs Hospital nung ketdangsür temi ashiba agi, Israel-i amakba nung asüba nisung 16 tasü mang parnok dangi bener aru.

Doctors Without Borders ajanga ashiba agi, Deir al-Balah nung bus ataa aliba mapang parnok den inyaker occupational therapists ka khaset aser nisung pezü kanga sashia yiru.

Gaza City nung aliba Shifa Hospital ketdangsür temi ashiba agi, nisung tasü mang pongu den yirur aliba nisung kar parnok dangi bener aru, aser staff tem mozüki metongteter, kechiaser Israel-i iba yimti atsüngdoktsü nükdong nung kanga sashia amaker.

Danga mozüki temia Israel-i injang khaloktsüba nung ano nisung tenet asü ta ashir. Israel mitkar nungi sangdong kecha agüja mali, shirnoki telungpur dak dang amaker ta ashir aser Hamas tenüng sena parnok nisung aliba tesem nung

amenoka aliba ajanga civilian tem lendongi yoker ta ashir.

Gaza-i teyari oset bener aoba rong tem rongnung tatembang buba Israel sepaitemi Palestinian territory tzükum anasa soitogo.

Video ka live sayuba nung Israel sepaitem iba rong telungi Hokulbarnep aita liasü.

Poland indang nisan songa aliba Marinette rong nungya nisung trok mena liasü aser Global Sumud Flotilla indang rong 44 nungi tatembangba liasü.

Israel indang Foreign Ministry ajanga social media nung, Greta Thunberg aser Europe nungi ozüng yanglur kar densema rong nung mena aliba activists tem junga lir aser parnok pei limai meyipa yoktsü asoshi Israel-i anir ogo, ta ashi.

Hamas ketdangsür kati, Trump aser Netanyahu nati mulunga agizüka aliba proposal nung onük karbo khenyongi agizükla masü aser item jibo yanglushitsüla, ta shia lir.

Palestinian factions den shisa agitepba sülen telangzüba agütsütsü, ta pai ashi aser Hamas-i par tebilemba Qatar aser Egypt nem metetdaktsüogo ta ashir.

Hamas-i anir telungpur temi October 7, 2023 nü Israel south len maka nisung 1,200 shi tepseter ano nisung 251 pua bener aoba ajanga iba rara ya tenzük. Pua bener aor timba taoba mapang ceasefire tezüngzüktep kübok chiokogo.

Trump sentong kübok iba tesemi humanitarian aid aitsü, Gaza yanglushia Palestine nunger million ana dak tema international governance kübok ayutsü.

Israel-i Gaza amakdang Palestine nunger nisung 66,200 dak tema tepsetogo aser ano nisung 170,000 dak tema yirutsüogo, ta Gaza indang Health Ministry ajanga ashir. Ministry ajanga züngdangba nung civilian aser telungpur melemsar, saka asür tesadang ka shi tetsür aser tanurtem lir ta ashir.

Israel-i taoba ita asendenshir Gaza City amakba sülen Palestine nunger 400,000 shi tesem balalai jena ogo.

Hamas mitkar indang tashi ya timba ajemtsüogo, saka tesem balala nung maneni amaker. Bodhbarnüa Gaza nungi Israel dak 'projectiles' tenet khaloktsü, saka ibaji ajanga asü-amaba mali.

PCC nung cricket practice pitch tasen ka semzük



Dimapur, Mongputeni/Oct. 03 (TYO): Patkai Christian College ajanga Chümoukedima District Cricket Association den lungjemer Patkai Christian College Ground nung cricket practice pitch tasen ka October 3, 2025 anepdang semzuka liasü.

Iba sentong lenir Wetshele Thopi, Dean of Students, Patkai Christian College ajanga lanurtem sempet tajungba kuma anitetsü, yimya tajung adokdaksütsü, teamwork aser kaketshir tem cricket asayatsü mangdang aliba koktetba nung yaritsü nungdakba indang lemsatepa liasü.

College administration tenung nung Dr Thepfulvie Pieru, Principal, Patkai Christian College ajanga jembidang shisaluyim nung saisapong indang shilem rateta ashi aser College-i saisapong

balala ya shisaluyim nung tongtipang shilem ka ama züngshir, ta ashi.

Patkai ya Nagaland nung private colleges tejentiba rongnung ka süala aser taoba küm Hon Jubilee mungaka, private institution asünungji talisa saisapong tsütsü facilities kar peria mali, ta pai ashi.

"Tesem peria liaka, asen kaketshir yaritsü facilities shidak maka. Iba cricket practice pitch yangluba ajanga kaketshirtem pei shisaliok den külemi cricket nung temulung agütsütsü ajungmesor," ta Dr Pieru-i ashi.

India nung cricket ya nungtugutiba saisapong ka lir aser asen sobaliba nunga shilem ka ama kumogo, anungji iba facility ajanga kaketshir aikati pei sempet angatetsü aser tarutsü nung professional cricketers karbo akumtsü imlar,

ta paisa ashi.

Sentong akhumtong Watinuksung Jamir, Joint Secretary, Nagaland Cricket Association ajanga jembidang, cricket ajanga nüburtsem lungjemdaksür, lanur cricket asayar ajungmesor, yimya tajung, teamwork aser meranga inyakba yimya adokdaksür, ta ashi.

"Iba maongka agia meranga inyaka pei mangdang ataloktsü lanurtem dang ajungshir," ta pai ashi.

Nagaland Chief Minister Dr Neiphiu Rio tir sür Nagaland Cricket Association ajanga state ajunga ajangzüksü asoshi meranga inyaker, ta paisa ashi.

Iba sentong tembanga Rev. Dr. Vichukho Ngukha, Chaplain, PCC ajanga sarasadem aser Watinuksung Jamir-i iba cricket pitch ya semzüksü.

World Weightlifting Championships nung Mirabai Chanu-i silver angu



Forde, Mongputeni/Oct. 03 (Agencies): Anaben tashi Commonwealth Games nung gold medal angur India tsür Saikhom Mirabai Chanu-i küm asem nung tang mezügbuba medal, silver, Brehostibarnü World Weightlifting Championships nung ngua liasü, koba Forde, Norway nung agitar.

2022 küm sülen tang mezügbuba World Championships aser Paris Olympics nung pezü buba jenjang nung tembangba sülen asayamung tanabuba nungya Chanu-i ajak senteper 199kg (84kg snatch + 115kg clean and jerk) ajungketteta silver medal ya angu.

Chanu-i temulung lemlema snatch nung 84kg ajungket saka

87kg nung anaben merangba nung takok mongutet. Ajisüaka lai snatch section nung 84kg ajungketba ajanga bronze angu.

Clean aser jerk nung Chanu-i 109kg ajungketa tenzük aser iba sülen 112kg ajungket aser tatem nung 115kg ajungket, koba ajanga iba asaya nung aser overall standings nung silver angu. Overall gold ya DPR Korea nung defending champion Ri Song-gum nem agütsü, shibai ajak meyokteper 213kg (91kg + 122kg) ajungketa liasü aser clean and jerk nung 122kg ajungketa world record tasen yanglu.

Song-gum yagi Asian Games nung gold medal anaben tashi nguteta lir. Thailand tsür Thanyathon Sukcharoen-i 198kg (88kg + 110kg) ajungketa

bronze angu. La ya Asian Games nung anaben bronze medallist lir.

Paris 2024 nung Chanu yagi 49kg category nung 199kg (88kg snatch + 111kg clean and jerk) ajungketa liasü. 2017 küm Anaheim nung World Championships mapang 194kg (85kg snatch + 109kg clean and jerk) ajungketa 48kg category nung gold ngua Karnam Malleswari-i 1994 aser 1995 nung atonga-atonga takok marok anguba sülen la ya India indang mezügbuba World Champion akum.

Bogota nung 2022 Championship mapang Chanu-i 49kg category nung 200kg (87kg snatch + 113kg clean and jerk) ajungketa silver angu. 2023 küm lai temang tuozük bo asadang saka kasa category nung yintem ajungketba nung shilem magi Olympic qualifiers asoshi meyrui kumzuka ayutsü mulungtet.

Ibai India asoshi World Weightlifting Championships nung medal 18 buba alitsü, kong gold asem, silver 10 aser bronze pongu - ajak ya tetsür temi anguba.

25th NSF MM Trophy: Ward-19

Kohima-i PLLA Manipur akok

Kohima, Mongputeni/Oct. 02 (TYO): Indira Gandhi Stadium Kohima nung tang tesayadak 25th NSF Martyrs' Memorial Trophy nung Ward-19 Kohima aser Michazou FC pre-quarter finals asayatsü mekaogo.

Hokulbarnü mezüng asaya nung Michazou FC ya pre-quarter final asoshi qualify asü, kechiaser Sadar Hill Football Academy, Manipur asaya tasembuba nung masayatet. Iba yongji Michazou FC ta pre-quarters nung Red Scars den asayatsü.

Asaya tanabuba nung Ward-19 Kohima-i PLLA Manipur madak 2-1 agi akok.

Iba asaya nung Player of the Match ya Ward-19 Kohima nungi Laba Jr nem Vizhoto Hibo, Commandant, 4th NAP Thizama ajanga agüja liasü.

Asaya tenzük minute trok buba nung Ward-19 Kohima nungi Bikash-i mezügbuba goal agütsü aser minute ishika lir ano külem telok nungi Kakhevi Assumi-i tanabuba goal agütsü.

PLLA Manipur nungi menur injury time nung Hemgoulal-i goal ka ya agüja liasü.

Matches for October 4:

1. Mao Students' Union vs Phesama Students' Union @ 12 Noon
2. Football 4 Change vs Dimapur Chaos @2pm

Kohima nung Inter-Highschool Futsal Tournament tenzükogo



Kohima, Mongputeni/Oct. 03 (TYO): Kohima nung Inter-Highschool Futsal Tournament mezügbuba Coraggio School Futsal Turf Kohima nung October 3, 2025 nü tenzükogo, koba The Adjustment Bureau ajanga Coraggio School den lungjemer ayongzük.

Iba sentong nung akhumdong ka ama 9 Kohima Town nungi MLA Dr. Tseilhoutuo Rhutso-i jembidang, shisaluyimer tem dang saisapong aser extracurricular activities ya tongtipang lir, saka tongtipangtibaji lesson meranga azügba ya lir, ta ashi.

Nenok tsürabor temi bendanga agütsüba aser rongsen jenti indoka nenok züngdaksüba ya amajok masütsüla, ta pai ashi.

Iba sentong tenzuka Medovito, Associate Pastor, Lerie Baptist Church ajanga sarasadem aser iba sülen Convenor, Organizing Committee, Anato Sema-i jembidang iba asayamung

mangdang lemsatepa liasü.

Iba sülen Kevichüto Yhoshü ajanga asayartem tenangzükba agia liasü.

Iba asayamung nung school 33 nungi shilem agir aser October 4 nü pre-quarters asayatsü asoshi school 16 qualify süogo.

LA Two Wheeler, AS Gadget Store, Imperial Coaching Centre, Mimi Deli, Foodwifi, Kohima Canopy, Smart Garage, Imprint, Life Sports, aser Tipfü Retreat Kigwema teyari nung iba asayamung takok ngua ayongzüket, ta asayamung ayonger temi ashi.

Maneni parnokisa Vilelie Khamo and family, Dr. Tseilhoutuo Rhutso, Dr. Hovithal Sothu, Zhothose Kraho, Vilone Sakhrie, Vilopi Sakhrie, Viketol Sakhrie, Krodi Rhetso, Colo Mero, Vilekho Bio, Dr. Thajanuo Angelina Solo, Kekhriezhazo Solo, Art and Culture Football Club aser Lerie Youth Organisation dang pelaba lemsatepa liasü.

BILEMDANGANG

"Taküm nung jangratemtsü tulutibaji temeim."